

# Vun driweriver

erscheint auf [www.lenauheim.de](http://www.lenauheim.de)

monatliche  
Erscheinung

April 2011

von Helen Alba

## Die Oma in der Stadt

Es Rita war sechs Jahr alt, de Uwe erscht zwaa. Die Sorche for die geploote Eltre sin immer greesser gin. Sie han pinktlich uf ihrem Arweitsplatz sin misse un dorte ihre Norm erfillen. Wer fiehrt es Rita in die Schul un holts um 12 Uhr wieder ab? Wer wärmt em es Esse un git owacht, dass die Kiner ke Bleedsinn anstelle, wann se leenich beinaner sin? Weil es dauert noch e Jahr, bis mer de Uwe in de Kinergarte fiehre kann.

Ufm Dorf hat die Altoma, die schon 80 Jahr alt war, noch ihre eigeni Wertschaft gfiehrt. Un was macht mer nit alles, um de Kiner un lieuwe Enkle zu helfe? Es Haus is abgsperrt gin un die Altoma is in die Stadt gewannert, hat sich schnell ingelebt, uf die Kiner owacht gin, gekocht un is sogar Milch un Brot kaafe gang.

Noh em Mittachesse hat es Alter sei Recht gfordert. Doch am helllichte Tach es Bett abraame, des hat sich nit gin. Die Oma hat sich uf de Diwan in e Ecke ghuckt un is ingegummt. Es Rita hat sei Hausaufgaben mache selle un de Uwe hat mole derfe. Kaum hat die Oma anfang zu schnorkse, die Händ hat se im Schooß leije ghat, is es luschtich gin in dere Stub. Die Kiner han die Spingle ausm Nähkerwl rausgsucht, der Oma ihre Schwowerock an die Diwandek angspingelt un mit Karioka ihre Fingernägl rot angemolt. Um so e Zeit ware se die Eenichkeit in Person, was selten vorkumm is. Derno han se ohne Mukser ufm anre Rekamee gsitzt un gewart, dass die Oma wackrich gin soll. Wanns ne dann zu lang gedauert hat, han se ufmol de „Keichhuschte“ kriet. Vun dem Kummedi is die Oma verschrock. Doch wie se die rote Fingre gsieht, will se ufhupse, zieht die ganzi Deck noh sich un kummt druf, dass se wieder mol angspingelt is. Sie profezeit, dass die Mutter de zwaa de Hinnre versohle werd. Doch wann die hemkumm is, saat die Oma nor: „Die zwaa ware heit so brav, dass mer e Spinnnodl falle hätt heere kenne. Sie sin doch mei liewi Knechte, die zwaa!“

## De Akaziebaam

Er war im Mitte Hof gstann uni s mer noch gut in Erinnerung. Was der Baam nit alles miterlebt hat! Im Frujohr, wann er voll mit Bliehe war, des war e Gsumms runderum! Un erscht de Akazieduft! Meiner Seel, in dem Baam seiner Schätt hats Mittachesse doppelt so gut gschmeckt. Oft han sich Freind sich dorte versammelt, wann Namestach gfeiert gin is. Oft is gsung un getanzt gin, bis weit noh Mitternacht.

Uner dem Baam is so mancher scheeni Traam geträämt gin. Vun der erschti Liebschaft hat mer sich naner verzählt, was wohl kumme werd, wann de Liebschti inricke muss, ob der seim Minsch trei bleiwe un vill Briefe schreiwe tut. Oft is dorte ach Rutz un Wasser gebrillt gin, wann mer Liebeskummer ghat oder e schlechti Not kriet hat.

Ich gsiehn heit noch vor Aue de Zallasch unerm Baam un mei Kiner drin. Wann ke Zeit war, wann kenner sich mit dene Kiner bschäftiche hat kenne, sin se raus ausm Zallasch un uner de Baam kumm, wu se sich leenich vertoore han derfe. War jo ach vill zu gsiehn: Die Oma hat de Rewe gebunn, de Ota es Gras ghackt. Un die Gassekiner han im Sandhaufe newedran ihre Lakaiplatz ghat. Mer hat sogar bis ufs Tenn schauwe kenne, wu de Kokosch stolz hin un her gang is un die Hingle gegackert han, wu de Waldi an eener langi Kett angebunn uf Hof un Haus owacht hat gin misse.

Später hat de Akaziebaam herhalle misse. E Glunsch is kaaft gin, die Stricke hat mer an die starke Äscht feschtgebunn. Wie war des herrlich! Vogelfrei un ohne Sorche sin die Kiner der Reih noh geglunzt gin. Geger Owet hat die Altoma sich kummod uner de Akaziebaam gsitzt, die Kiner rum se rum. Die scheenschte Rätsle hat se verzähle kenne, un so manchi Gschicht erfunn. Es war Ruh im Hof. Nor die zittrich Stimm un es Bienegsumms hat mer gheert. Un die Akazieduft tief in die Luft gezoo.